

RM15j tingkat paras air Sungai Lebam

Johor Bahru: Langkah meningkatkan paras air di Empangan Sungai Lebam dekat Kota Tinggi membabitkan kos tambahan lebih RM15 juta baru-baru ini, dijangka mampu mengatasi kesan fenomena El Nino.

Pengerusi Jawatankuasa Kerja Raya, Kemajuan Luar Bandar dan Wilayah Johor, Datuk Hasni Mohammad, berkata kerajaan negeri yakin rancangan jangka pendek itu dapat mengelak bekalan air berjadual dari berulang di sekitar Kota Tinggi dan daerah ini terutama akibat fenomena cuaca panas melampau.

Katanya, Johor juga sudah mengemukakan permohonan kepada Kerajaan Persekutuan melalui Kementerian Tenaga, Teknologi Hijau dan Air

(KETTHA) berjumlah RM100 juta bagi meningkatkan penyaluran air ke Empangan Sungai Layang, Pasir Gudang yang turut terjejas kerana fenomena kemarau sekarang.

Atasi bekalan air

"Kerajaan negeri maklum mengenai El Nino dan rancangan jangka pendek yang bertujuan mengatasi masalah bekalan air di Pengerang dan Johor Bahru sudah dan sedang dilaksanakan.

"Kesan El Nino boleh menjejaskan paras Empangan Sungai Lebam dan Layang tetapi pada masa ini keadaan masih terkawal," katanya kepada BH di sini, semalam.

Beliau berkata demikian ketika ditanya mengenai fenomena cuaca panas melampau yang

menyebabkan bekalan air berjadual di beberapa kawasan di daerah ini dilanjutkan.

Hasni berkata, bekalan air berjadual di kawasan terjejas kawasan Pasir Gudang, Masai dan sebahagian Johor Bahru sudah ditamatkan akhir tahun lalu manakala di Kota Tinggi dan Pengerang masih diteruskan sehingga Jumaat ini.

"Dengan siapnya Projek Air Mentah RAPID di Pengerang yang mendapat sumber air dari Empangan Sungai Seluyut maka kerajaan negeri akan berbincang dengan PETRONAS mengenai hasrat untuk mendapat sumber air dari punca yang sama.

"Kami akan minta perunding untuk mengkaji kesesuaian dan kaedah untuk melaksanakan rancangan berkena-



Hasni Mohammad

an," katanya.

Dilaporkan taburan hujan di seluruh negara dijangka berkurangan antara 20 hingga 60 peratus bermula bulan ini, berikutan fenomena El Nino kategori kuat yang sedang melanda Malaysia.

Jabatan Meteorologi berkata fenomena pemanasan suhu permukaan laut yang berlaku dalam tempoh enam bulan setiap dua hingga empat tahun di timur Lautan Pasifik menyebabkan suhu negara dijangka meningkat antara 0.5 hingga dua darjah Celcius.